

Hezkuntza • Euskarazzzz kanpaina



PABLO S. QUIZA

DONOSTIA. Irudi eder askoz gozatzeko aukera eskaintzen du abionetak. Goiko argazkian, Donostiako panoramika ikus dezakegu, baina bidaian zehar Donostia ez ezik Lekeitio, Bidasoaldea, Zarautz eta kostaldeko beste herri askotakoak ere ikus ditzakegu (iruditan hurrengo orrian).

Euskara lau haizetara

Gipuzkoako Foru Aldundiak euskara sustatzeko 'Euskarazzzz' kanpainako abionetak Euskal Herriko kostaldea ezagutzeko aukera eskaintzen du

Idoia Viteri | **HONDARRIBIA**

Gipuzkoako Foru Aldundiak uztailaren 14an *Euskarazzzz* kanpaina abian jarri zuenetik, eulitxo itxurako abionetak makina bat hegaldi egin ditu dagoeneko. Uda osoan zehar, jendea euskaraz bizi dadin sentsibilizatzeko xedeaz, Euskal Herriko zati handi bateko zerua zeharkatzen du eguneko bi hegaldietan. Euskararen aldeko aldarrikapena lau haizeetara zabaltzen duen abionetan bidaiatzeko aukera paregabea izan zuen atzo EGUNKARIAK.

Arratsaldeko 16:00etan Hondarribiko aireportuko kafetegian genuen hitzordua. Abioneta txikia izaki, lau pertsona garraiatzeko baimena besterik ez du. Hala, kazeta honetako kazetari eta argazkilariak gain, beste bidaiari batentzako lekua utzi genuen soilik; pilotua ahaztu

gabe, noski! Izan ere, auskalo non geundeke orain Ugaitz Iturbe bilbotarrarengatik izan ez balitz. Mikel Ansa hernaniarra izan zen, EGUNKARIAKO ordezkariak gain, 'eulitxoan' zerua zeharkatzeko pribilegioa izan

zuen 15 urteko gaztetxoa. Euskadi Irratira deituta eskuratu zuen hegaldirako txartela, zozketa baten ondorioz hautatua suertatua izan eta gero.

Eguraldia lagun, Hondarribiko aireportutik Lekeitiorainoko

ibilbidea egiteko igo ginen zzzz euli soinua islatuz, jendeari euskaraz hitz egiteko gonbita egiten duen aldarrikapena zeruan astintzeko. Auto txiki batekin parekatu liteke abioneta barrenetik ikusita, aginterako

botoi, palanka eta argitxoak kenduz gero, beti ere. Motorea piztu baino lehen, hegazkinak erortzeko duen arriskuaren portzentaiaz galdetzean, «%1ekoa besterik ez», erantzun zuen Iturbe pilotuak. Eta «autoz bidaiatzea askoz ere arriskutsuagoa da, ez larritu», gaineratu zuen gero.

Segurtasun neurriak bermatu eta airera!

Beharrezkoak diren segurtasun neurriak hartu ostean, motorra piztu eta ordubetez entzun behar izan zen burrunba hots indartsua martxan jarri zen. Inork behar izanez gero, botaka egiteko poltsak non zeuden azaldu zuen pilotuak, eta irrati bidezko konexioa ahalbidetzen dizkionten entzungailuak jantzi zituen. Bazirudien ordubeteko bidaia une batetik bestera hasiko zela: Lekeitio (Bizkaia) jomuga. Gerrikoak ondo estutu...eta gora! Uste baino aireratze gozoagoa izan zela azaldu zuen Mikel Ansa bidaiariak.

Hala, zeru oskarbitik bidaiatuz, Hendaiatik Lekeitio bitarteko Euskal Herriko kostaldea ez gozatzeko parada izan zen.

(Hurrengo orrian jarraitzen du)

SENTSIBILIZAZIO KANPAINAK

Gabonetarako asmoak

Gipuzkoako Foru Aldundiak euskararen aldeko hiru kanpaina egin ditu orain arte. Duela urtebete *Euskara zure unibertsoan*; pasa diren Gabonetan *Gabonetan opariak euskaraz*; eta aipaturiko *Euskarazzzz* hau. Gabonak eta uda ditu Foru Aldundiko Euskara Zuzendaritzak sentsibilizazio kanpainak aurrera eramateko garairik egokienentzat, «haurrek oporrak dituztenez, aisialdirako denbora gehiago baitute».

Aurtengo gabonetan ekin zitzaion *Gabonetan opariak euskaraz* kanpainari, haurrek eskatutako opariak euskarazkoak izateko ahaleginean.

Bestalde, Orioko aterpetxean, DBH mailan B eta D ereduetan jarduten diren neska-mutilei zuzendutako kanpainan, hiru bost egun tarteko egonaldiak antolatu dituzte; beti ere, euskarazko jarduna indartzeko. Egitarauaren barnean, ingurua ezagutzeko ekintzak, piraguismo ikastaroak eta teknologia berriei baliatuta euskaraz etengabe aritzea da kanpainaren xedea; beste guztietan bezala. Ekintza horiek guztiekin, euskara ikastolarekin loturiko hizkuntza besterik ez dela jakinarazi nahi da; euskara hizkuntza bizi bat dela, alegia.

Udako *Euskarazzzz* kanpainaren arrakasta ikusita, Gabonetarako beste proiektu bat presatzeko asmoa azaldu zuen Foru Aldundiak.